

Kálag eche Jemse Ndibned ní kálag

Kálag echë Jemse átélé ehóbé tângene mekan níme bad bé Krísto bétáŋgéné abel pónde ésyāā́l á alonjé ádāb. Bad bé Dyōb ábe bépántédé áte nkōŋsé áte n̄syāā́l b́o Jemse ánteléé ch́o. Abēnlédé ngan híin áléb bad bé Krísto tângene metón híin. Mmē metón médii, ábé nh̄on ne ábé atóg, mekəgsen, abé á bwām, ánh̄on bad nkóŋtéd, adúbe ne mbeltéd, ngáne bad bé Krísto bétáŋgéné echém abenled, áwónj debyéé, nselag, kúmbe ne asuded á yāl, ábíded mbakú á yāl e bad, ákum ekáá á t̄āl, áwesen, ne ákáne.

Jemse awédé áte á kálag tē wê nén aá mbeltéd níkag ekuu ehóg ne adúbe.

Nkabtéd ní kálag

Ndibned ní kálag *1.1*

Adúbe ne áwónj debyéé *1.2-8*

Abé atóg ne ábé nh̄on *1.9-11*

Ákəg ne ákud mekəgsen *1.12-18*

Áwóg ne ábel *1.19-27*

Ngabén eéhnadté *2.1-13*

Adúbe ne mbeltéd *2.14-26*

Ngáne mod a Krísto ábenladté echém *3.1-18*

Mod a Krísto ne mekan mé nkōŋsé *4.1-5.6*

Elébé émpēe *5.7-20*

¹ Mē Jemse, mbaledē a Dyōb ne awē Sāŋgú Yesu Krístəə, mē-éé ntenle nyé enén kálag. Nlente nyé

metúmbé dyôm ne mébe mé bad bé Israel níme
mépánjtédé áte nkõhsé áte nsyāāl.

Jemse aá bad bédúbe Krístəə
béwõh-’ε debyéé

² A-baányan, póndé ké ehéé echë nyaa e
mekəgsen ké ehéé étané nyé, nyétéd nê e’bon é
yāl áte. ³ Nyébíí nén bán nímén mekəgsen níme
nyékudéé áyāl e adúbe áde nyéwóó, méwéde nyé
nlém á abum. ⁴ Nlém n̄wúu nyé á abum káəh á
asóg âbel bon mbeltéd n̄mēn n̄tyéem bwâm n̄lôn-
ne mbon, âbel bon nyéewóó’ abé dé mbéb ké ahóg
á alongé ádēn.

⁵ Nyé ké ahéé awě atóge’ debyéé, áchān Dyõb
aá ábe mó. Dyõb dóo ábage moosyāal debyéé ne
nlém nhóg, ésebán akwognad modmod, äbe-’ε mó.
⁶ Bon pen nzé nyéchāa Dyõb nyédúbé bán äbe
nyé chõm éche nyésédte mó ésebán nlém n̄káadte
nyé á abum. Mod awě nlém n̄káadteé á abum
ádii néε edíb é nkwe’ éche éhode’, epub éhúene’
mendíb ped enén étimne eníníí. ⁷ Ene ndín e mod
eewémtán aá mókũd chõm wéε Sāngwéé. ⁸ Adii
mod awě awóó nlém n̄be, eechānád-taá hõm
ahóg áyāl e kéchéé éche ábeléé.

Betóótōkē bé bad ne behən bé bad

⁹ Mod a Krísto awě eésě etógnén á’sō é’ bad
bémpēe atāngéné abé kúmbe nzé Dyõb áchāgté mó
ám̄in. ¹⁰ Mod a Krísto awě adé etógnén á’sō é’
bad bémpēe atāngéné abé kúmbe nzé Dyõb ásúdté
mó. Nhóbe nén áyāle āmaá melemlem ngáne
ébéneé mbonja e nkəákəə awě adé á ahín-tē. ¹¹ Nzé
enyen épene ne ngíne ábe e’hyé bé ekíde é’belé
é’hyáád ane nkəákəə, éche mbonja-’ε ébelé ésoo,

e'boŋ é'bāb-pe é'belé é'maa. Melemlem nê dōo behon bé bad bémaá'é anan áde bēnanéé nīmāb nhon ámbid.

Jemse ad mekagsen méēhūu'ē wēe Dyōb

¹² Nnam ne kēnzéé awě awēséné mekagsen, áyāle nzé atómé nīmē mekagsen áte, Dyōb débe mó nsábe nīme nídé alongé áde áhóbé aá móṣbě bad ábe bédáá mó. ¹³ Nzé mod akudé mekagsen eetāŋgenéé ahób aá, “Mmēn mekagsen méhúú wēe Dyōb.” Mod eéhēlē-se ákag Dyōb ne ebébtéd, melemlem ngáne Dyōb-pe déekagéé mod ábel mbéb. ¹⁴ Mewēmtēn mé mbéb mé mod mwēn móo mékəə boŋ ahún á mekagsen-tē, ene pónde-'aá nīmē mekagsen métédeé mó nlém á abum boŋ mehaŋ mó. ¹⁵ Mmē mewēmtēn nīme mébāg mod áte mó-'aá mépeene mbéb, nzé nīmē mbéb-pe níkwógé mod áte, nípiinad mó kwééd.

¹⁶ A-baányan bé edaŋge nyéēdōgnād. ¹⁷ Nde e bwām ké ehéé ne kéchéé éche éloné mbon éhúú ne Titéé awě adé ámīn. Titéé mó ahagé bwēm é'syāal ábe é'pene ámīn. Abén bwēm é'pene-ε nhəŋlén ne nhəŋlén, boŋ Dyōb pen déehəŋlanné. ¹⁸ Dyōb dēmbel ntíi ábe syánē alongé dékōlē abe áde ámbéé syánē échē eyale é mbále. Ambel nê ábel boŋ átintē e nīmē nhəgtéd nīsyāal, syánē débē ngáne mbote e'só echě bébagéé mó nēe mende.

Jemse ad bad bé Dyōb bébele ngáne eyale é Dyōb éhóbéé

¹⁹ A-baányan bé edaŋge, nyébii nīmēn mekan. Mod téé ábē mehél áwóg dyam áde mod ampée áhóbéé, mod eewámsán dyam ahób pen, mod eewámsán-ne aliŋ. ²⁰ Meliŋgá mé mod

méemwagké-se ábēl mekan míme Dyöb áhedéé aá ábel. ²¹ Né-óó nyétede mekan mé mbinde ne mekan mé ebébtéd mésyāāl míme nyébeleé. Ne asuded á yāl ásyāāl, nyékob eyale éche Dyöb áwéné nyé á nlém-té. Echē eyale chóó Dyöb ábenladté áson adēn alongé.

²² Nyébele ngáne eyale éhóbeé. Nyéēdōgē yāl se nyéwōgē chó wógēn. ²³ Kénzée awē awóge' eyale é Dyöb, ésebán abele' ngáne éhóbeé, adii née mod awē anone' ábe e'só á dyené. ²⁴ Amaá eche yāl anyín, bon aké áde ákagké, abelé áchatén ngáne e'só é'díí mó. ²⁵ Bon bad ábe békoo' mbéndé echē etāngéné anōn áte, mbéndé eche ehúde' bad á mehan, nzé béhíde chó ngáne éhednadté saké bán béléá' chó bon béchatén-ne, bon pen, béhíde chōm éche éhóbeé, Dyöb dénaméd bó áyāl e kéchéé éche bébeleé.

²⁶ Mod ké ahée awē awémténé aá móbele' ngáne Dyöb áhedéé bon eekóbe éche echém, ene ndín e mod adoge eche yāl, adē abele á Dyöb-pe, adé ngēn. ²⁷ Abele Dyöb nyaa eche esáá ne eche etāngéné á'sō é' Dyöb Titée, adii anōn menyuu ne bekúd ábe bétage', ne ácháá yāl bwām ésebán mekan mé mbinde mé nkōnsé méwóge mod áyāl.

2

Jemse aá béētēdē baahóg etógnén ábiníí-'e nkójtéd

¹ A-baányan, nyé nēngáne bad ábe bédúbpé eched Sán, Yesu Krístəə, Sāngwéeé awē échē edúbé échábé ámīn, nyéetāngeneé née nyényíné mod á dīd-te se nyétedé mó etógnén ké-'e nkójtéd. ² Détéd

bán mod asólé wée nyéládné, ahédé nzêd é gól, ahédé-’ε kase é mbóté, ntógétōke mí mod mómpe ísólé, ahédé mbóté é mbinde. ³ Nzé nyêbagé mod awě ahédé kase é mbóté edúbé boŋ nyéláŋgé mó bán, “Hyě édyεε enén kase e e’dii,” boŋ nyéláŋgé-’ε ntógétōke mí mod bán, “Tyéém hê,” ké’ε bán, “Dyεé á ndɔɔb tê hê,” ⁴ né nyélúmté bán baahóg bétómé ábíníí, né nyékáadte-’ε bad ne mewémtεn mé mbéb.

⁵ A-baányanŋ bé edəŋge, nyéwóglan. Eesaá mbále nén bán Dyɔb ápwédé betóótōkē bé bad á nkõŋsé te aá bédúbe Krístəə-yε? Adé adúbe dɔs-’aá adé nímāb nhən, apwεdé-’ε bó ábé bad ábe bébē áwē nkamlεn. Mmē nkamlεn mósó ahóbé aá mósɔbě bad ábe bédósó mó. ⁶ Boŋ nyéetédεé betóótōkē bé bad née dyam. Saá behən bé bad bóó bétagte nyé-yε? Eesaá mbále bán bóó békene nyé á kóte-yε? ⁷ Eesaá mbále bán bóó béhóbe đin dé edúbé áde ane awě akamlan nyé mekan mé mbéb áyāl-ε?

⁸ Nyéēběl dyam áde átəŋgéné nzé nyêkoo’ mbéndé e nkamlεn eche Krístəə ahíd eche éténlédé nén bán, “Edəŋ mwănyonŋ ngáne édáá echonŋ yəl.” ⁹ Boŋ nzé nyêtede baahóg etógnén ábíníí-’ε nkóŋtéd, né nyébele mbéb, né mbéndé e Dyɔb-pe ekóbé nyé née bad ábe bébóó mbéndé. ¹⁰ Kénzée awě ahíde mbéndé boŋ abóó mbéndé póg, né abóó mbéndé ésyāāl. ¹¹ Mod awě ahóbé aá, “Nyéekábé mesón á ndáb e e’wónŋgé,” mó ahóbé ámpē aá, “Nyéewúé’ bad.” Né-ɔó, nzé mod eekábé mesón boŋ awúé’ bad, né abóó mbéndé. ¹² Nyéhóbe dyam, nyébele-’ε mekan née bad ábe bébíí bán Dyɔb dékāād bó, nchoo ne eche mbéndé éche éhúde bad á mehanŋ-tê. ¹³ Mod awě eewóge

mod ampée ngɔl, Dyöb-pe déewógké mó ngɔl nzé akáadte bad. Boŋ mod awě awóge bad bémpēe ngɔl, éewógké mbwóg mbwe níme Dyöb ákáadteé bad.

Jemse aá nzé adúbe déekii ne mbeltéd né áwédé

¹⁴ A-baányan, nzé mod ahóbé aá módūbpē Krīstəə boŋ eébélē mekan níme mélūmte bán awóo adúbe, bwām é'héé é'dé áhed? Adē adúbe áhele ásōŋ adē alongé-ye? ¹⁵ Dětéd nén bán mwānyon a Krīsto nhóg eewóo'é chōm éche áhāgkē á yāl, eewóo-'áa ndyééd e epun é bīn. ¹⁶ Boŋ nyé mod nhóg alángé mó aá, “Ekag bwām, ékud chōm éche éhāgkē, ékūd-te ndyééd éche édyāgkē.” Nzé nyélangé mó nē ésebán nyébage mó chōm éche átógnéné, né bwām é'héé nyébélé mó? ¹⁷ Melemlem nē dǒǒ édíí ne adúbe. Nzé mod awóo adúbe áde éebeléé ngáne ádē adúbe áhóbéé, né ádē adúbe áwédé.

¹⁸ Mod nhóg ālāā me aá, “Mod nhóg awóo adúbe, aníní-'é abele mekan mé bwām,” me-'é mētímtén mó mēé, “Lúméd me ngáne mod áhele awóŋ adúbe ésebán abele mekan mé bwām, mélūméd we ádēm adúbe áyāl e mekan mé bwām níme mbeléé.” ¹⁹ Edúbpé nén weé Dyöb ádíi ahóg. Nē ádé bwām. Kááŋne e'dəədəŋ bé mbéb bōmpē é'dúbpé nē, é'nəə-'é ne mbwóg. ²⁰ A-eyókél é mod, ehede weé bélúmed we nén bán nzé mod awóo adúbe boŋ eébélē ngáne ádē adúbe áhóbéé, né ádē adúbe déesaá dyaandyam-e? ²¹ Cheé ênkǎŋ boŋ Abraham, awesyánē sáá ambáá, ákobnéd á'sō é' Dyöb née mod awě abele' mam níme Dyöb áhóbé? Saá akwenten áde ânkwenténné ábe awe mwān Aisige née mendε-ye? ²² Nyényíné nén bán adúbe áde

Abrahamε ne nímē mbeltéd békágé'áá ekuu ehóg, nímē mbeltéd-te mēnkǎŋ áde adúbe álón mbon. ²³ Nén dēmbēl eyale é Dyöb énnýinnēd mbále ngáne éténlédé nén bán, “Abrahamε andúbé Dyöb. Nén dēmbēl Dyöb dēnkob mó nēngáne mod awě abele mekan níme métǎŋgéné.” Né-óó, bad bēnchǎg Abrahamε bán nsón a Dyöb. ²⁴ Nyēnyiné nén bán mbeltéd mí mod nibele boŋ mod ákobnéd á'sō é' Dyöb née mod awě abele' mekan níme métǎŋgéné, saké adúbe dēmpen. ²⁵ Melemlem nē dōó émbēē ne akwalεε awě béchágé'áá bán Rahabe. Ankobnéd á'sō é' Dyöb áyāle bad bé Israel ábe bēnlōmmē bán béhyε bēnɔn dyad áte á mesɔm-tē. Anköb bó nken, abídéd-te bó á dyad-tē, nzii empée á mesɔm-tē. ²⁶ Ngáne yǎl e moonyon echē eewóo edǎdǎŋ éwédé, melemlem nē dōó adúbe áde déekǎg ne mbeltéd áwédé.

3

Jemse aá mod-té ákamlan échē echém

¹ A-baányan, nyé bad híin nyéebág bemeléede bé eyale é Dyöb. Nyébíi bán Dyöb dékáād se bemeléede tómaa ngáne ákáádté ábíníi bad. ² Syánē baásyāāl debele mewusé á rǎhóbtéd. Kénzée awě éēbēlē awusé á rǎhóbtéd adíi mod awě ádē abé átyéémé, ahele-'ε eche yǎl akób ábel boŋ eēbēlē awusé. ³ Détéd eláŋsén ne hósε. Nzé mod ahede aá hósε ébel ngáne áhedεé, abelé ahé chó chöm á nsəl-tē. Echē chöm chó-'aá ábenladté ályóged ene hósε kéhéé wée áhedεé aá éke. ⁴ Ké'ε détéd eláŋsén ámpē ne böle é'mbáá ábe é'dé á edíb é nkwě-te. Kénée édíi bán é'kálé bwāmbwam, epub é ngíne

chó-'aá éκεεne bó, mod awě adole' ábê böle mwă abámbe móō ábenladté áκεεn bó kéhéé áde ádáá.
⁵ Melemlem nê dóó édii ne echém. Kénée édii bán édé mwămpin á yăl e moonyon, édé kúmbe bwâmbwam áyăl e nímē mbeltéd.

Nyényin ngáne mwă muú ahele se ahyáád ahín ámbáá. ⁶ Echém ámpē édii nêngáne muú. Edii ped e yăl e moonyon póg, ébele' mbéb ní kamlan yăl e moonyon esyăál. Ébele' alongé á moonyon ásyăál abé nêngáne ákóbné muú, muú níme níbidé á dŭ-á-muú, níme méēđimē'. ⁷ Moonyon akamlan nyaa é nyam ésyăál. Akamlan nyam é mehín, ákamlan menon, ákamlan nyam éche édole abum ásē, ákamlán-ne nyam ésyăál éche édé á edib é nkwě-te, ambootéd-te chó akamlen se á mbooted. ⁸ Bon modmod ééhēlēē-se ákamlén echém. Echém édii chōm é mbéb éche modmod éehelēē-se ákamlen, éloné-'ε ne e'we bé mbéb ábe é'pεene' kwééd. ⁹ Chóó débēnladté áκεεn Săngú Dyōbe, awêd Titée, chó-'aá débēnladté ábe moonyon ebómán. Moonyon mó-'aá Dyōb áhágé áwágεn mó. ¹⁰ A melemlem mé nsəl dóó e'yale bé mekenag ne ebómán bébidεé. A-baányan, éetāngénεé abé nê. ¹¹ N'yélé mé edib nhóg méehelēē-se mébidtē mendib níme mésáá ne mé mbinde abided ahóg. ¹² A-baányan, alín dé asáá déehelēē-se áchyáá e'pum é píε. Ké'ε alín á sabé déehelēē-se áchyáá e'pum é' mesáá. Edib-pe éche ébidte mendib mé nkwě, éehelēē-se ébidéd mendib níme mésáá.

Debyéé áde áhúú ne Dyōb

¹³ Mod adé átintē echên awě awóó debyéé awón-ε nsōηten-ε? Alúmed nê ne alongé á bwâm áde

áwóó, áyāl e kéchéé éche ábeleé. Abel nê ne asuded á yāl áde debyéé áde áwóó ábélé bon awón. ¹⁴ Bon nzé nyêwóó kán áte eche edé mbéb, nyétōntan-ne dásō échen yāl, nyéēbenlád debyéé áde nyéwóó ábel mbéb tñgene ayáge á mbále, akum áde nyékuméé ekáá á tâl, ¹⁵ ene ndín e debyéé eehúé'é ne Dyöb. Edii debyéé áde áhúú ne bad bé nkōnsé. Adii debyéé áde áhúú ne bad ábe béewóó Edáádāñ é Dyöb, debyéé dé edáádāñ é mbéb. ¹⁶ Kéchéé wéé bad béwóó kán áte echē edé mbéb, bétōntān-ne dásō échab yāl, mpuutéd mbélé mbé, nyaa e ebébtéd ké ehéé-'ε ebāg áhed. ¹⁷ Bon debyéé áde áhúú ne Dyöb ádé nhāñlén. Kénzéé awē awóó ádé debyéé eewóó'é atón dé mbéb ké ahóg áyāl. Ene ndín e mod adāə nsāñ, apwiitad, achede yāl áwóglēn bad bémpee, awóo ngol bwāmbwam. Abenle bad mekan mé bwām ésebān akwāgnad modmod, abele-'ε nê ne nlém nhóg. ¹⁸ Nzé bekóm bé nsāñ bébele nsón míme nípeene' nsāñ átíntē e bad, nê débēl bad bébelé mekan míme Dyöb áhedéé.

4

Jemse áá bad bésuded yāl, Dyöb ákamlēn bō

¹ Cheé épeene nzum ne nselag átíntē echēn? Eesaá mbále bán esíí é awón á bwēm éche éwane nyé nzum áte, chōó ékəə' bon nyébelé nēn-ε? ² Ehedē chōm bon weékudéé chó, nê ábélé ewúú mod. Ewóó esíí áte bwāmbwam ákud chōm bon weéhéléé chó akud. Nê ábélé nyēsenle, nyéwanne-'ε nhóg ne aníníí nzum. Nyéékūdēē chōm éche nyéhedeé áyāle nyéēsēdtēē Dyöb chó. ³ Nzé nyéhedne Dyöb chōm, nyéékūdēē chó áyāle nyéhedne chó mewēmtēn mé mbéb. Nyéhede

bwēm dāsō áwóged échen yǎl menyinge. ⁴ Nyêdé nêngáne bad ábe bédé á ndáb é mewóngé, boŋ bébé békābē mesón. Nyéebíí'é bán ábane nlém ne mekan mé nkōŋsé ábele nyé bad bé ekoyí bé Dyōb-ε? Né-ᵛó kénzée awě adəá nlém abane ne mekan mé nkōŋsé, abelé eche yǎl mod-a-ekoyí a Dyōb. ⁵ Nyêwémténé bán ngên-εé éténlédé á kálag e Dyōb nén bán, “Dyōb ábánné nlém aá edəádəŋ éche móhédé syánē áte, ébē échē, adé-'ε kónjí ne chó-yε?” ⁶ Boŋ Dyōb ábage syánē nsimé abε ne abε. Nê dós-'aá ákəá boŋ éténlédé á kálag e Dyōb nén bán, “Bad ábe bédé kúmbe, Dyōb ákunnad bó yǎl, boŋ ne bad ábe bésúdté yǎl, Dyōb ábage bó nsimé.”

⁷ Né-ᵛó, nyésuded yǎl á'sō é' Dyōb. Nyéwúen Satanε nló áte. Nzé nyêbelé nê, mós-'ε átom mehéle. ⁸ Nyépe Dyōb benben, mómpē əpě nyé benben. Nyé bad bé mbéb, nyésóg mbéb abél. Bad-te ábe béwóó nlém níbe, nyébane nímen nlém ábel mekan níme mésáá. ⁹ Nyésuden áyāl e nímen mbéb. Nyélebe', nyéchyε-'ε. Nyésóg awᵛᵛ, nyélebe' lebén, nyésóg menyinge awóg, nyésuden sudnén. ¹⁰ Nyésuded yǎl á'sō ábe Səŋgwéé. Nzé nyêbelé nê, áchəgəd nyé.

Jemse áá mod eekáadté mwǎnyan

¹¹ A-baányan, nyéehóbé nhóg ne aníníí mam mé mbéb á yǎl. Kénzée awě ahóbe mwǎnyan mam mé mbéb á yǎl, ké'ε akáadte mó, né ahóbe mbéndé e Dyōb mam mé mbéb áyāl, né ahóbe-'ε aá ene mbéndé eéboo'é. Nzé ehóbé wεé mbéndé e Dyōb eéboo'é né weébēlēē chōm éche mbéndé éhóbé aá bēbel. Boŋ né etédé etál échē éesě échōŋ ábē mod awě akáadte. ¹² Mod nhóg mwěmpen-εé adé awě abage' mbéndé, mwěmpen-naá akáadte bad.

Mwěmpen-εέ ahele ásōη alongé á bad, mwěmpen-naá ahele abébéd dó. Boη we, nzé-módé édíí ákáad mwānyoη?

Jemse aa mod eebag kumbe

¹³ Bɔɔb-pɔɔ, nyéwóglan, nyé bad ábe nyêhóbe bán, “chii ké’ε chän, séékě dyad dekalengɔme, séēdyéé áwed mwě nhóg, sékábe nyongé, sékudé-’ε nsyáη.” ¹⁴ Nyêbíí dyam áde débēnléd chän-ε? Chán nyêbíí bán alongé áden ádé? Alongé áden ádíi nēngáne mbag. Ebâg á esōη é pón dé, ámbid enê, weenyínéé chó ámpē. ¹⁵ Chōm éche nyétāngéné ahób édíi nén, “Nzé Dyōb ákwénténé, né séēbē á alongé, sébēl-le áden dyam ké’ε ádííí.” ¹⁶ Boη bɔɔb, nyétimé nyékume ekáá á tâl ne kumbe esyáál. Enén ndín e akum dé ekáá á tâl eetāngēné. ¹⁷ Né-ɔɔ, kénzēé awē abíí dyam á bwâm áde átāngéné abel, boη eébele dó, abelé mbéb á’sō é’ Dyōb.

5

Jemse aa behon bé bad bétéd pón dé

¹ Nyé behon bé bad, nyéwóglan me! Nyéchyé’, nyéhágke e’saád áyāl e metake míme mépií nyé. ² Mmén nhon míme nyékúme mí máá abɔɔ, síi-’ε émáá nyé asan adyé. ³ Echen gól ne sílva éche nyélímmé ásē, émáá ngag akób. Ene ngag eche ekóbé ábê bwēm, chó ebēl boη Dyōb ákógsén nyé, émád-te nyé ásē née muú. Nyékúmmé yāl nhon enén pón dé echē edé bēnben ne e’pun bé asóg. ⁴ Nɔné’, weesábpéé bad ábe bēbēnlé we nsón á nzag-tê. Etimé edogé bó dogén. Nén ábélé ábê bad ábe wēesábpéé ádab awé áwógnad á’sō wéé Titée, Dyōb á Ngum. ⁵ Abé áde nyédíí á

nkõṅsé hén ádíi âchog alongé, nyêbele-’ε kéchéé éche nyédáá. Nyékódte m̄m̄en mewêmt̄en, kénée nyébíí bán epun éche Dyõb dékõgsennē ábē bad bé ekoyí ékwógé ap̄ε. ⁶ Nyêhóbé bán bad ábe bébele mekan m̄me métânḡéné á’sõ é’ Dyõb bédé bad bé mbéb, nyêwúú-’ε bó. Béheleé nyé atyēem̄en.

Jemse aá bad béw̄esen metake

⁷ Né-ṵó a-baányan, nyéw̄esen kááṅ Sánḡwéé ap̄ε. Nyétêd eláṅsén ne mod awě abele nzag. Abelé ásin kááṅ ne pónḡdé echē ápādtē mbote é bwâm. Awesan kááṅ ne á pónḡdé eche mbúú e’só ébootadté achó, ne áde édimtanné achó. ⁸ Nyémpē nyéw̄esen, nyéwéd-te nlém á abum, nyésine’ ep̄ε éche Sánḡwéé, édé benben. ⁹ A-baányan, nyéenyonḡé áte tâṅḡene nhóg ne aníníí âbel bon Dyõb déêhōbē aá nyêdé bad bé mbéb. Nyébii nén bán mod awě akáadte’ adé nyé benben. ¹⁰ A-baányan, nyétêde e’chemléd ne bekal bé’dáád̄an. Békálé’áá nkalan á ð̄in áde Sánḡwéé, békudé metake, béw̄esán-ne n̄m̄é metake. ¹¹ Ne mbále, syáā dech̄age bad ábe béw̄éséné bán bad ábe békudé n̄nam. Nyêwógé ngáne Jobe ânw̄esénné áde ákudé metake, nyényin-ne ngáne Dyõb dêmbenlé mó bwâm á asóg. Sánḡwéé aboó nlém bwâmbwam awóó-’ε nlém ñ ngal.

¹² Amin e m̄m̄én mésyāā, a-baányan, nyéēbenlād ð̄in dé nkoṅ m̄m̄ín, ké’ε dé nkõṅ ñsé, ké’ε chõm émp̄ēe ânwé melě. Bon pen, nzé ehóbé“εε” abé εε, nzé ehóbé-’ε “Aáy” abé aáy. Nzé nyêbelé nén, né Dyõb déekõgsénné nyé.

¹³ Kénzée awě adé á metake tē, ákânne. Kénzée awě awóge menyinḡe, ákóne ákené-’ε Dyõb.

14 Kénzée awě eedyεε bwâm, áchæg belyáged bé mwembé, békânned mó. Nzé békânnad mó béwōgtē mó dyōg á dīn áde Sánḡwée. 15 Nzé édé bán békânnédé mó ne nlém nhóg, né Dyōb déwōg bó mekáne, nê déběl-lε mod a nkole ádyēē bwâm. Sánḡwée áběl áhídē á anonḡ dé nkole, ádyēē bwâm, ké mbéb-pe móo ámbenlé Dyōb délagsén mó. 16 Né-ǎó, nyépale mbéb áte wée nhóg ne aníní, mod téé ákânned-te mwānyan, ábel bon nyédyεε bwâm. Mekáne míme mod awě abele mam míme métánḡéné á'sō e' Dyōb, médé ngíne bwâmbwam, mébele-'ε nsón. 17 Elaijaa abédeε moonyon melemlem ngáne syánē. Póndé póg ankáné bwâmbwam aá mbúú eechóg, mbúú enkénchó-'aá á etún é mwě rílán ne epeḡ. 18 Ambíd enê ankáné ámpē, Dyōb ábél mbúú echó, bwēm é'bootéd-te akwog.

19 A-baányan, nzé nyé ké ahée atědté áhíd nzii e mbále e Dyōb, bon mod ampée abelé atímné mbíd, 20 ábíi nén aá, kénzée awě abelé bon mod awě abelé mbéb asóg mbéb abel, né asoó alongé áde mod awě abelé mbéb. Nén déběl-lε mbéb híin míme ane mod ákébenlé, Dyōb déenǎnné mó á dīd.

Mel̃ Mékō̃lē
New Testament in Akoose (CM:bss:Akoose)

copyright © 2011 Wycliffe Bible Translators, Inc.

Language: Akoose

Translation by: Wycliffe Bible Translators, Inc.

Akoose

bss

Cameroon

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Akoose

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 21 Feb 2024 from source files dated 29 Jan 2022

0143729f-907e-5098-b6ce-63b1629b8e48